

O Camiño de Santiago durante o verán

Bonos Iacobus

O Bono Iacobus é un servizo turístico deseñado especificamente para o [Camiño de Santiago](#).

Permite percorrer por etapas as distintas vías históricas que dende hai séculos conducen a [Santiago de Compostela](#), aloxándose cada día nunha casa de turismo rural diferente.

O Bono Iacobus ofrece sete rutas diferentes para gozar do [Camiño de Santiago](#), que son: O Bono Iacobus do Camiño Francés, o , o Bono Iacobus do Camiño Fisterra-Muxía, o Bono Iacobus do Camiño Portugués, o Bono Iacobus do Camiño do Norte, o Bono Iacobus do Camiño Inglés e o Bono Iacobus do Camiño Primitivo.

O prezo inclúe o aloxamento, as ceas, os almozos e os traslados en coche desde os establecementos rurais ata o inicio e final de cada etapa. Tamén é posible contratar como servizos opcionais o picnic para o xantar do día, o traslado da equipaxe e o aloxamento en [Santiago de Compostela](#).

Máis información: http://www.turismo.gal/que-facer/bono-iacobus?langId=gl_ES

Bono Iacobus do Camiño Francés

O **Camiño Francés** é a ruta máis coñecida de entre as distintas vías históricas que chegan a **Santiago de Compostela** (Camiño Inglés, Camiño Portugués, Camiño do Norte, Camiño Primitivo, Vía da Prata...). Foi recoñecido polo Consello de Europa, en 1987, como o I Itinerario Cultural Europeo e distinguido pola UNESCO, en 1993, como **Patrimonio Cultural da Humanidade**. No ano 2004 outorgóuselle o premio Príncipe de Asturias da Concordia.

Ten a súa orixe en territorio francés —de aí a súa denominación— e entra en Galicia por unha verea ascendente que alcanza a súa máxima altura nos altos do Cebreiro. En todo o percorrido galego o camiñante poderá gozar da hospitalidade da xente, dunha rica e variada gastronomía, dun importante patrimonio artístico e, en xeral, de todo un país acolledor disposto a recibir ao viaxeiro.

Máis información: http://www.turismo.gal/que-facer/bono-iacobus/camino-frances?langId=gl_ES

Bono Iacobus: Camiño Fisterra a Muxía

O **Camiño de Fisterra-Muxía** é a única ruta xacobeá con orixe en Compostela. Aínda que o **Camiño** conclúe como tal na cidade de **Santiago**, a peregrinación non remata en Compostela.

Desde a máis remota antigüidade, todos os pobos e todos os viaxeiros que se achegaron a este recanto occidental de Europa sentiron desexos de proseguir a ruta do sol, de chegaren á fin da terra para contemplar a inmensidade do finito e ver o sol penetrando nas augas do mar. Algúns peregrinos decidiron xa nas súas orixes prolongar a súa peregrinación ata a **Costa da Morte**, o último reduto e terra coñecida daquela, convertendo en tramo final da súa viaxe un itinerario sinalado no ceo pola Vía Láctea.

Máis información: http://www.turismo.gal/que-facer/bono-iacobus/camino-fisterra-muxia?langId=gl_ES

[Bono Iacobus do Camiño Portugués](#)

A peregrinación a **Santiago de Compostela** tivo en terras lusitanas unha importante proxección, participando o pobo portugués activamente no desenvolvemento do culto xacobeo.

Xa dende o século XII os peregrinos partían dende núcleos de poboación do país veciño tan importantes coma **Lisboa, Coimbra, Porto** ou **Braga**. A motivación fundamental desta peregrinación foi relixiosa, pero este fluxo secular de persoas que poboaron os **camiños de Santiago** tamén contribuíu a establecer entre Portugal e Galicia profundos lazos de intercambio cultural, económico e de pensamento.

Máis información: http://www.turismo.gal/que-facer/bono-iacobus/camino-portugues?langId=gl_ES

Bono Iacobus Camiño do Norte

O **Camiño do Norte** é quizais a ruta máis histórica, a primeira que toman os peregrinos de todo o cristianismo europeo da época para alcanzar **Santiago de Compostela**. A orixe da peregrinación a Santiago pola ruta da costa cantábrica remóntase aos momentos inmediatamente posteriores ao descubrimento da tumba do que din ser o apóstolo Santiago o Maior (s. IX).

A dominación da práctica totalidade da Península Ibérica por parte dos musulmáns, deixa acantoados os reinos cristiáns nas zonas máis setentrionais do país. Os camiños do antigo Reino de Asturias foron pioneiros en canalizar os devotos peregrinos a **Santiago**.

Máis información: http://www.turismo.gal/que-facer/bono-iacobus/camino-do-norte?langId=gl_ES

Bono Iacobus do camiño inglés

O denominado **Camiño Inglés** é unha das rutas marítimas xacobeas que se utilizaba na Europa medieval para alcanzar **Compostela**. Peregrinos procedentes dos países escandinavos, os Países Baixos, o norte de Francia e principalmente de Inglaterra, Irlanda e Escocia chegaban por barco ao norte de España entrando en Galicia polos portos de **Ribadeo, Viveiro, Ferrol** ou **A Coruña**. Estes dous últimos portos, situados nun amplo golfo que os romanos denominaron *Portus Magnum Artabrorum*, consolidáronse tradicionalmente como os puntos de partida das dúas alternativas do **Camiño Inglés**. Os navegantes chegaban a porto guiados polo feixe de luz da **Torre de Hércules**, faro romano declarado **Patrimonio da Humanidade no ano 2009**.

Unha vez en terra, ambas as dúas alternativas conflúen na parroquia de **Bruma**, pertencente ao municipio de **Mesía**, e chegan a **Compostela** despois de cruzar terras de **Cambre, Carral, Mesón do Vento, Ordes** e **Oroso** entre outras.

Máis información:

http://www.turismo.gal/que-facer/bono-iacobus/camino-ingles-dende-a-coruna?langId=gl_ES

Bono Iacobus camiño primitivo

O **Camiño Primitivo** debe o seu nome a ser o primeiro itinerario xacobeo do cal se ten referencia.

Un dos primeiros devotos en seguir esta ruta foi o **rei Afonso II o Casto** que, gobernando o Reino Astur, realizou o camiño dende Oviedo ata **Santiago de Compostela** no primeiro terzo do s. IX, para visitar a tumba do Apóstolo descuberta poucos anos antes. A achega do monarca resultou chave para consolidar a peregrinación a **Compostela** ao confirmar que os restos aparecidos pertencían a Santiago o Maior. Por orde do rei construíuse unha pequena igrexa no lugar do achado, e a noticia propagouse entre a comunidade de crentes, iniciándose as peregrinacións e a organización do culto apostólico na nacente urbe.

Máis información: http://www.turismo.gal/que-facer/bono-iacobus/camino-primitivo?langId=gl_ES